

Präsidentinnen Bericht 2024

Am 5. März 2024 si mir mit 48 awäsende Vereinsmitglieder i ds nöie Vereinsjahr gstartet. Dr Erlös vom Glückspäckliverchouf hei mir de Berner Wanderwäge gspändet. Mir hei den ou grad die bluemige Früehligsgrüessli mitgnoh und uf die flissige Händ vo de Awäsende chönne zeue, wo üs ghuulfe hei, die Blüemli ds verteile. 21 Personne im Alter vo 20gi - 100 jährig hei mir i 10 versch. Wohn- Pfleg-und Läbensinstitutione dörfe gah überrasche.

Im März isch scho so einiges glofe: ig ha am Bäregger-Froueforum teil gnoh, und üse Verein ar HV vom Orts- und Verkehrsverein verträtte. 15 gueti Brockihälferinne hei mit dr Brigitte ir Pizzeria Bahnhofli ihres wohlverdiente Merci-Ässe gha und e gsellige Abe verbrunge.

Im April si Karin und ig zämä ad Delegierte Versammlig uf Zollikofe vom VBL, Verband Berner Landfroue.

Ig bi de no ei Tag uf Thun ad Delegierteversammlung vom SGF Bern/Friiburg. Per Los isch üs e Partnerverein zueteilt worde: es isch Roggwil. Mir si gspannt, wie mir üs im loufende Jahr mit ihne chöi ustuusche, das verzelle ig de öich im Verloof vo däm Bricht.

Ändi April hei mir üse erscht Früehligsalass ir Brocki gha mit Chleidertusch, feinem Chueche und Kaffi. Mir hei fröid gha, dass üser Chleiderständler si gfüllt worde und Hose, Röckli, Jacke etc. nöii Bsitzerinne hei gfunde.

Bim Eröffnigsfescht vom Fүүrwehr-und Wärkhofgebäude het üse Pizaofe ume mau e Uftritt gha und mir hei de Bsuecher feini Flammbrötli backe. Bi däm Alass hei üs einigi Mitglieder tatkräftig unterstützt, sigs bim Ufriichti-Brunch, wo mir hei mitghulfe, bim Zwägmache vo dr Festwirtschaft oder äbe när hingerem Ofe.

Im Mai hei mirs bim 2. Alouf gschafft via Grosshöchstette – Näscht si 10 Wandervögu schnatternd Richtig Schlossallee uf Schlosswil und hei dert es gmüetlichs Apéro gnoh. Petrus isch guet druff gsi, nid z Heiss, nis ds Chalt, zwar bewölkt aber irgendwie halt gliich durstig. Mir hei när ömu no hurti chlii i Löie müesse....

Im Mai ha ig mi wieder mit üsne umliegende Froueverein- und Landfroue-Vorstandsmitglieder troffe zum jährliche Ustuusch.

Ändi Mai, hei mir z erschte mal z`Visite dörfe. Am Abe hei sich 11 Froue bim Heidi Lanz im Steichratte troffe und dert auergatti Interessants, Nöis und Verblüffends über d Steine us aller Wält aber bsunders ou über üser Schwiizerschätz erfahre. Bimne gmüetliche Apèro hei mir dä zfriednig Abe lah usklinge.

Leider hei mir wieder gwitterhafts Räge-Wätter gha, wo mir itz ändlich uf dä Napf hätte wöue, und so hei mirs wieder müesse absäge.

Sitem Früehsummer isch üse Froueverein ou i de Socialmedie verträtte. D Sabrina postet dert immer wieder chli üses Vereinsläbe. Die Biiträg dörfe gärn gliket und teilt wärde. Wär ke Insta und Facebook het... macht nüt, verzeltet eifach aune Froue, was mir für ne gueti Sach hei i üsem Froueverein.

Im Juni hei mir no üsi Vorstandsreis gmacht. Bire schöne Sunneuntergangsfahrt ufem Thunersee hei mir üs ds Ränzli mit feine Fajitas gfüllt.

Afang Summerferie si 32 Froue und 16 Ching mitem Car uf Hofstette a Brienzersee gfahre. Ir Trouffererläbniswält hei mir e kuuuhli Usstellig gnosse und ds einte oder andere Grosi/ Mami oder Tanti het ghulfe e Schwarzfläck-/ Simmitaler-/ Rotschäggeti oder ou grad rägebogefarbigi Chüeh male. Mir hei de dert picnicet oder üs ou grad im Restaurant lah verwöhne. När si mir de uf Brienz gfahre zum Füess wäsche, Spiele, spaziere und gmüetlich Käffele am See. Uf dr Heifahrt het ds einte oder andere de es Nückli gnoh.

Ar 1. Ougustfiir vom Orts-und Verkehrsverein ha ig dr Froueverein miteme Hälfersatz verträte.

Afangs September si mir wieder uf d Seniorereis und hei 109 Seniore-und Seniorinne uf däm Usflug dörfe begleite. Das Jahr isch nöie Rekord gsi mit de Teilnähmer, es het de ou grad 3 Car bruucht. Kes Wunder, d Annemarie organisiert ou immer so intressanti Reisli mit üs. Mir si via Lindenthal uf Seeberg zure wunderschöne Chiuche mit ere no schönere ca 700 jährige Linde gfahre. Zum Glück überchöme mir geng die beste Chauffeure vom Zwahle für die Reis, es isch nämlich chli äng gi. Nachem Znüni hei mir de mitem Pfarrer Döppner e Andacht gha und dr Pfarrer wo Seebärg het üs no grad mit lustige Anektote die alti Gschicht um die Chiuche erläüteret. De si mir geng chli wächseln zwüsche Kanton Bern und Solothurn uf Ramiswil, zure Buurehof-Wirtschaft gfahre und hei dert es feins Zmittag übercho, d Huusmusig het no es Paari gspielt und de hei mir heizue müesse, bevor d Rägewulche Zäzi erreicht hei.

Mitti Septämber hei mir ar Gwärbusstellig mitere Vereinswand uf üse vielsiitig Verein dörfe ufmerksam mache. Mir hoffe, dass jedi Frou ds Zäzi und ds Mirchel itz weiss, dass mir Agebot für gross und Chliin, fitti, interssierti, gselligi, älteri und jüngerer hei....ömu paar Nööimitglieder het d Marianne i üsi Kartei dörfe ufnäh.

Ändi Septämber hei mir ar Brächtete zämä mit dr FÜRwehr wieder Flammbrötli bache, u mit dr Popchornmaschine ds Mais lah blubbere. Über 700 Flammbrötli und ca 120 Portione Popchorn hei mir verchouft. Ou ir Brocki hei vieli schöni Sache nöii Bsitzerinne gfunde us dr ganze Schwiiz. Ds schöne Herbstwätter het üs sicherlich ghulfe, dass vieli interessiert us Nah und Fern üsem Dorf und üser Tratition e Bsuech hei abgstattet.

Am nächste Tag isch Ufruumete ir Brocki agstande. Neu dörfe mir e Lagerruum ir Zivilschutzalag bruuche, wo mir die gsperrigere Möbel übere Winter düüre dörfe lagere. So hei mir gar nid viel müesse entsorge sondern eifach chli müesse umruume.

Am Herbstgnuss mitti Oktober hei 44 Ching üsi Merhrzweckhalle ume ine läbhafti Markthalle verwandelt und ihri Spielsache zum Tusch- und Verchouf abote. Üsi chliini Festwirtschaft mit Kürbissuppe, Hotdog und feine Gebäck het zumne glungne Familiealass für vieli Familie biitrage. Dr Erlös hei mir de Unwätterschädigte vo Brienz überwiise.

Ändi Oktober hei mir a üsne 4 Schuel-Standorte; Zäzi-Schuel, Zäzi-Chindi, im Schuelhuus Mirchel und d Oberschüeler im Schuelhuus ds Oberhünige mit Pousemilch ideckt. Die Milch wird üs zahlt vo Swissmilk und mir fröie üs, dass üser Landching überall hei ustrunke. Es sii 471 Milch verteilt worde mit und ohni Ovipulver.

Wos gäge erscht Advänt zuegange isch hei mir wieder mit dr Wiehnachtsbescherig für üser Ü85-jährige gsartet und hei uf flissigi Häuferängeli us üsem Verein dörfe zeue. Mit 14-Frouegschänkli und die 7 Mannegschänkli hei mir es paar Senior-inne und Seniore i üsem Dorf dörfe überrasche und ihne

es kurzes Bsüechli mache. I fröie mi immer ganz bsunders über die überrschte Gsichter bi de Beschänke, wo das zum erschtemal dörfe i Empfang näh.

Am Senioreässe im Dezämber het sich de üsi Kassierin Sandra unger die Ü50-Jährige gschliche und het de dert awäsende Zäme-Ässe-Gäscht es Kaffi zahlt im Name vom Froueverein.

Mitti Dezämber hei mir im Kirchgemeind-Huus d Seniorewiehnachte gfiiret. 42 Seniorinne und Seniore si vor Schuel Mirchel mit bekannte und weniger bekannte Wiehnachtslieder überrascht worde, dr Pfarrer het passend zur aktuelle Wältlage es paar Wort a aui grichtet und de si mir zu Kaffi/Tee und Chueche i Zvieriteil übere. Bim Schätzwettbewerb stuune ig immer wie guet und genau üser Lüüt schätze. I hoffe, die Begabig chöm de bi mir ou no mal.

Im Januar si mir uf üsi Winterwanderig. Die verschneiti Winterlandschaft hei mir nid grad chönne bestuune, aber es isch e lustigi gselligi Wandertruppe vo 9 Froue richtig Sahleweidli glofe und het dert es Fondue gnosse.

Afangs Februar hei mir üse zuegloset Partnerverein Roggwil ds Bsuech gha. Mir hei denä Roggu-Vorstands-Froue üses Dorf, üsi Brocki und üses Vereinsläbe dörfe vorstelle und si scho gspannt, we mir de üsi Gwungernase uf Roggwil chöi gah inne strecke.

Mitti Februar si d Sandra und ig richtig Langenthal id Porzellanfabrik gfahre und hei ds Gschirr im Turnhalle-Office wieder alles uf 250 Stk komplettiert.

Ändi Februar hei mir dr Spielabe mit dr Papeterie Büchi düregführt. 9 Froue und 1 Maa hei ä gsellig, lustige Spielabe zämä verbrunge und derbii lustigi, eifachi und komlelxeri Spieli kennegleret, wo einige uf jedefall nie meh vergässe.

Ungerem Jahr si immer wieder Kürs und Vorträg gsi, wo d Evelyn und d Jolanda hei begleitet und organisiert. Si si jedes Jahr besträbt, es vielsiitigs Bildigsagebot zämä ds stelle und hei es offens Ohr für Idee und Wunsch vo üsne Mitglieder.

Üse Pizzaofo het das Jahr vieli Feschтли und Aläss dörfe erläbe und Karin isch ziemlich beschäftigt gsi mit umekutschiere.

I möchte bi derä Glägeheit aune Vereinsmitglieder härzlich danke, für öies Mitwürke und derbii si Jahr us Jahr ii. Ohni öich giengs nid und miechs ou kei Spass.

Ou e härzliche Dank geiht a aui mini Vorstandskolleginne, jedi vo denä Froue git viel Härzbluet i üse Verein, i bi froh ha i Öich a mire Siite.

Dr letscht Dank geiht a Gmeinde Zäziwil und Mirchel, a üsi Kirchgemeind, a üses Gwärb ir Umgäbig und a die verschiedene Vereine, wo wohlwollend mit üs zämä spiele.

Rüttene, 26. Februar 2025

Öii Präsidentin Regina Schüpbach

